

من حالات الإشراف على العلاج النفسى: الحالة: (59) "ليس من مسئولية العلاج أن يصنع المعجزات"



yehiatrakhawy@hotmail.com

نشرة "الإنسان" 2018/12/09

العدد: 4117 - السنة الثانية عشرة - العدد: 4117

د. يحيى الرخاوي - الطب النفسى، مصر

مقدمة:

للتذكرة: اليوم الأحد هو يوم المقطعات الإكلينيكية والعملية من الإشراف المنتظم، وهذه النشرة ننشرها من جديد لأنه لم تصلنا أيه تعليقات عليها ناقشها فى بريد الجمعة فلعل فى إعادة نشرها ما يحفز بعض الأصدقاء للمشاركة فهى الحالة (59) لهذه السلسلة عن الإشراف أى فى الكتاب الرابع (41 - 60) ، ونأمل بذلك أن نكمل ما ينقص هذه الحالات حتى لا تصدر بدون تعليق يسهم فى مزيد من التوضيح والإفادة كما تبين لنا فى الأربعين حالة فى الكتابين الأول والثانى.

الحالة: (59)

ليس من مسئولية العلاج أن يصنع المعجزات (1)

أ. هاجر: هى عيانه أنا كنت قدمتها قبل كده، بس فيه حاجات جدت فكنت عايزة أسأل عن حاجة يعنى، هى عندها 28 سنه ..الأولى من اثنين، أنا كنت قدمتها المرة اللى فاتت علشان هى هستيرية شوية، كان بيحبها أعراض تحويلية جسدية كده كل شوية.

د. يحيى: إنتى قولتى الأولى من اثنين الثانى ده ولد ولا بنت؟

أ. هاجر: الأخ الثانى ولد، هى جت لى بعد رحلة علاج يعنى، عدت على كذا حد كده وكان بيحب لها التحول Conversion والأعراض دى كل شوية برغم العلاج

د. يحيى: جت لك من بره بره، ولا انا حولتها لك؟

أ. هاجر: هى بنت خالة عيانه كنت باشوفها، وهى بتصرف الأدوية تبع الشركة اللى بتشتغل فيها، دكتور الشركة هوه اللى بيدى لها أدوية وكده، فهى جاية علشان جلسات زى بنت خالتها،

د. يحيى: بتقولى كنت قدمتها قبل كده هنا، كان ليه؟

أ. هاجر: أنا كنت قدمتها المرة اللى فاتت علشان أسأل عن حاجة، هى مطلقة وكان اللى متجوزها المرة الأولانية كان...مدمن، وهى استحملت معاه شوية، ومابطش، فاتطلقت خلع وكده،

د. يحيى: قعدت متجوزة قد إيه؟

أ. هاجر: قعدت معاه حوالى سنه ونص، بس الجواز الفعلى مع بعض مايجيش شهرين، فأنا كنت قلت المرة اللى فاتت إن هى مش ناضجة خالص، وإن لها زميل فى الشغل أكبر منها بـ10 سنين، ومتجوز وعنده ثلاث أولاد، وكان طالبها للجواز، واتكلمنا المرة اللى فاتت، واتفقنا إن احنا نأجل معاها الكلام فى ده وحضرتك قلت لى إن هى بتتحرك من مجرد احتياجها، ويمكن هوه كمان جعان وكده، فاحنا أجلنا فعلا اتخاذا قرار فى ده.

د. يحيى: وموقف أهلها إيه؟

أ. هاجر: هى كانت جاية لى علشان أقف معاها قصاد أهلها، هى باباها صعب أوى شكاك، جداً ومتسلط مايبنتهاشمش يعنى، والأم طيبة قوى، فبعد المناقشة المرة اللى فاتت، اتفقنا على التأجيل، وهى

وافقت، وادى احنا مكملين فى العلاج، ويمكن تغير رأيها، بس فيه حاجة جديدة حصلت، ان مامتها اتوفت وانا فى الأجازة، أجازة جوازى

د.يحيى :والدتها أتوفت إمتى؟

أ.هاجر :وانا فى الأجازة يعنى من شهر مثلاً

د.يحيى :والدتها كان عندها كام سنه

أ.هاجر :والدتها كانت يعنى 64،65 جالها سرطان ومالحقش تتعب

د.يحيى :الموت يعنى يعتبر فجأة، مش متوقع .

أ.هاجر :برغم إن عندها سرطان إلا إنهم كانوا متوقعين أنها تتحسن، يعنى تعتبر ماتت فجأة،

تعبت فجأة دخلت المستشفى ماتت، فهى جت لى بقى مافيش حد عمل لها دعم، غير الولد ده، الراجل ده اللى معاها فى الشغل، وهو عمل حاجة كده مش قوى، طلق مراته، وبعدين قال لها أنا مضطر أرجعها تانى عشان حاجة كده، حاجة كده لها علاقة بالفلوس، مش عارفة بالضبط، يمكن عشان ماتتغلوش فى الفلوس أو حاجة كده.

د.يحيى :يعنى المهم إنه رجعها

أ.هاجر :آه، بس أنا مش مصدقه المعلومات دى أوى، شكلها حجج مش لايقة

د.يحيى :كل ده وانتى فى الإجازة بنتجوزى؟ يعنى خلال شهر واحد

أ.هاجر :آه، كل ده وأنا بتجوز

د.يحيى :راحت الولية ميتة، وراح الجدع مطلق، ومرجع، ألف مبروك وشك حلو عليهم!!

أ.هاجر :ضحك) يعنى، فهى جت الأسبوع اللى فات وهى زانقانى أوى إن هى خلاص مالهائش

حد غير الراجل ده، وبتخرج معاها بقى للساعة 10 بالليل، وما عادشى فيه مامتها، هى كانت صريحة مع مامتها فكان ده ببسندها، وفى نفس الوقت يوقف اندفاعها، لكن هى مخبية كل حاجة عن باباها فوالدتها كانت بتسمح لها، وتهديها، يعنى على الأقل كان فيه حد عارف، بيوقف المشاكل ما تتفجرشى قوى، وبتقف قصاد باباها معاها ساعات، فادلوقتى هى وباباها عايشين مع بعض لوحدهم، أصل أخوها بيشتغل فى شركة بعيد، بيحى كل شهر كده يومين تلاثة، وطبعاً علاقتها باباها وحشه جداً، وبتنزل الشغل من الصبح ماتروحش غير بالليل الساعة 10، والجدع ده تقريباً معاها طول الوقت، وهو حاول يتعرف على باباها وقت العزاء وكده، وهو الأب رافض تماماً إن هى ترتبط بشخص عنده المشاكل دى كلها، فهى جت لى عشان أفجنبها يعنى، أقعد بقى أجيب باباها وأتكلم معاها، وإن خلاص مافيش بديل غير الجدع ده، وهى حاسه إن مافيش بديل غيره فعلاً، وانا برضه من جوابا شوية ابتديت أحس إن: ويـجـرى إيه، طب ماتجرب تانى وخلاص ما هو حايتجوزها

د.يحيى :ما هو أياه؟

أ.هاجر :حايتجوزها، يعنى مش بيلعب، ده بيعرض جواز فعلاً .

د.يحيى :هوه مش لسه معاها الست اللى رجعتها عشان الفلوس زى ما بيقول.

أ.هاجر :آه، أنا كل اللى عملته يعنى إنى طلبت باباها تانى

د.يحيى :أنا شايف إن موت مامتها ده، خلى الأمور تتطور بسرعة مش ملا حقيقتها

أ.هاجر :أيوه، ما لحقناش نأجل آه

د.يحيى :السؤال بقى المرة دى هو نفس السؤال

أ.هاجر :أنا المرة دى مختلفة، أنا باتكلم عن موقفى أنا بعد الظروف ما بقت كده، انا من جوابا

شوية أبتديت أحس إنى عايضة أوافق بس مش عارفة أعمل أياه مع والدها، والدها معترض تماماً أنا جبته واتكلمت معاها، واتفقت إنه يماين معاها شوية، لكن هو طول الوقت رافض موقفها عشان الجوازة الأولانية بتاعة الراجل المدمن، أصل هى اللى أصرت على الجوازة الأولانية، وطبعاً فشلت تماماً، وهوه كان زميلها فى الشغل برضه

د.يحيى :ربنا ستر ما خلفتشى من الجوازة الأولانية، مش كده؟

أ.هاجر :أيوه، ما لحقناشى، وهو كان مدمن، وبيستغلها، وبيضربها وبيأخذ فلوسها ودهيبها

د. يحيى: طيب والجدع الجديد ده اللي رجع مراته لأسباب مادية، لما حايجل الاسباب المادية دى
حا يكمل طلاق، ولا حا يحتفظ بالانتين

أ. هاجر: حا يكمل طلاق

د. يحيى: إيش عرفك، ما يمكن كذاب

أ. هاجر: هو انا قابلته يعنى واتهياً لى إنى شفت فيه حسن النية، وإنه حا يكمل طلاق

د. يحيى: هو حا يكمل طلاق، صحيح، بس طلاق أنهى فيهم؟!

أ. هاجر: ما هو لما رجّع مراته كان رجوع رسمى بس، لأنه مقيم عند أخته مش قاعد عند مراته

د. يحيى: مش فاهم، يعنى رجعتها عشان يهرب من التزاماتها المادية من غير ما يعيشوا مع بعض

وهى رضيت؟

أ. هاجر: آه أظن كده، هى الحسبه بقت صعبه وانا عمالة ازداد تعاطف مع العيانة بتاعتى، أصل

أبوها صعب جدا، أنا لما قابلته ما طقت هوش.

د. يحيى: رغم إن هى كانت متوقعة الفقد ده، بموت أمها، ولو شوية، طبعا الفقد ده زود احتياجها

ليكى، وفى نفس الوقت زود احتياجها للراجل ده،

أ. هاجر: هى بتقول إنها بتحبه

د. يحيى: يعنى، ما تدقيش على الألفاظ دى قوى، هو الاحتياج عيب، ما هو شىء طبيعى، الاحتياج على

العين والراس، بس ماهواش نهاية المطاف، هو ممكن يكون جيد ونحترمه فى بداية العلاقة، أنا محتاج

وإنتى محتاجة، مش كده؟ ماشى، بس بعد كده بيحصل علاقة على مستوى تانى، ده إذا كانوا حا يشتغلوا

مع بعض عشان تبقى فيه علاقة فعلا، الاحتياج لوحده مش كفاية، ما بيررشى الاستمرار، دى مؤسسة،

والمؤسسين بيكبروا من خلالها، ده المفروض يعنى، لازم تتحسب كويس، برضه دورنا إحنا إن احنا

نساهم من على مسافة، ما نغرقشى معاهم وتبرر اللي بيعملوه باحتياجهم وخلص، إحنا لما نحافظ على

المسافة اللي هى جزء من العلاج، نقدر نشوف أحسن، ونبليج البنت باللى شافينه أول بأول،

أ. هاجر: يعنى دلوقتي أنا أعمل إيه؟

د. يحيى: أظن دلوقتي كده المسألة بقت أصعب، يعنى مش سهل زى المرة اللي فاتت إن احنا نوصى

بالتأجيل، بصراحة مش عارف، الظاهر أنا كمان ابتديت أضعف زيك، مع إنى عارف إن لها سوابق فى

الطلاق، بتبقى السكة دى مفتوحة قدامها آخر سهولة، وانت من الأول بتقولى إنها مش ناضجة وكده

أ. هاجر: هى من ناحية مش ناضجة، مش ناضجة خالص، واختياراتها مضروبة

د. يحيى: واحتياجها دلوقتي اشدت جدا جدا، خلى بالك الموت ما لوش دعوة بالسن، يعنى لما واحده ام

عندها 90 سنة وابنها عنده 70 سنة مثلا وتموت، ممكن تقاعله يبقى زى ما يكون بيرضع، الموت بيحرك

كده حاجة زى ما تكون غريزية، يعنى رقيقه جدا ومهمة، فقد الأم خصوصا فى مجتمعنا له وضع خاص

الظاهر، لأن مجتمعنا ما بيضمنناش بدرى، فقد الأم بيحرك فينا حاجات كثير، ساعات بتتأجل خبرة الفطام

لحد الموت، لكن برضه الفطام يمكن يكون تحريك للنضج مهما تأخر السن، فاخلّى بالك إن هى

دلوقتي عندها خبرة فطام، ويجوز برضه، ساعات الموت ببيعن رسالة إن الميت تخلى عن اللي كان

بيرعاه، فيظهر فى اللي كان معتمد عليه، نوع من الاحتجاج، أو العدوان، اللاشعورى طبعا، زى ما تقولى

إنتى سيبنتى ليه، سيبينى دلوقتي ليه؟ إنت اتخليتى عنى، حاجة زى كده

أ. هاجر: ما هو يمكن ده هو السبب اللي خلانى اتعاطف معاها، واقول أهو ياللا

د. يحيى: إنت رأيك إيه فى الجدع ده وانتى بتقولى إنك قابلتيه، يعنى رأيك فى شخصيته؟ مسؤول

ولا مش مسؤول؟ حا يتغير أول ما يستحوز عليها ولا عاوز إيه بالطبط؟ إنت ممكن تتطقسى شوية من

خلال معلومات أكثر عن مراته، وعن إيه اللي كان ناقصه فى مراته عشان بعيد كده، خصوصا إن

البنت دى مش ناضجة، وهات يا أعراض جسدية أول ما حد يقول لها بيخ، وكده، ما هو الخوف

برضه يكون الجدع مخموم فى البنية دى، وما يلاقى عندها بعد الجواز اللي يعوضه اللي كان ناقصه

فى الخبرة الأولانية، خلى بالك إن الخنقة بتاعة المؤسسه الزوجيه بتطلع المستخبي

أ. هاجر: يعنى أعمل إيه دلوقتي، أنا محتاسه خالص

د. يحيى: لأ مش قوى كده، هوه انتى اللى حا تتجوزيه، إنت فعلا عملتى اللى عليكى، وواقفة جنبها، وقدرتى تشوفى نفسك وانت بتغيرى موقفك، وشفقتك عليها ما خليتكىش تتدفعى وتستعجلى، حا تعملى إيه أكثر من كده؟

أ.هاجر: مش عارفة

د. يحيى: إنت نسيتى إنك معالجة، بتدى وقت، وبتاخدى أتعاب، إنتى فاهمة إن علينا إن احنا نعمل معجزات أو نغير الواقع، لأ بقى، ما هو لازم نعمل اللى نقدر عليه، ونسيب بقية أطراف المعادلة تمشى زى حسابات الواقع ما تسمح، إحنا مش مسئولين عن الأم اللى ماتت، أو عن إيمان الزوج الأولانى، أو عن جواز الراجل الثانى، دى كلها بلاوى واقعية، يبقى نعمل اللى علينا، ونقول اللى عندنا، ونستنى نشوف إيه ما دام بنحاول أول بأول، وما بنتقرجشى. هى العيانة دى منتظمة فى الجلسات ولا لأه؟

أ.هاجر: بصراحة هى مش منتظمة قوي، يعنى بتيجى لما بنترنق

د. يحيى: تترنق ازاي يعنى؟

أ.هاجر: يعنى تكون عايزة إنى أقرر لها مثلا، عموما هى زى ما تكون المره دى مش مديانى فرصه اقرر معاها، باين عليها قررت، وعايزانى اساعدها بس، أوافق يعنى

د. يحيى: ما انت واخده بالك من تغيرها زى ما انت واخده بالك من تغيرك، وده جيد جدا فى العلاج، إن احنا، زى العيان، نتغير مع تغير الظروف. وكل ما الوقت يمر، بنحصل على معلومات أكثر، والأمور بتتضح أكثر، ويمكن العيان بيكبر أكثر.

أ.هاجر: بس هى مش مديانى فرصه المرة دى فى حكاية الوقت عايزانى أوافق، يعنى عايزانى أساعدها بس فى انها تكمل فى اللى هيا فيه، هى المره دى مش مديانى فرصة **د. يحيى:** ما انا قلت لك ان احنا حا نوضح موقفنا ونعمقه وهى حا تتخذ القرار اللى هى عايزاه وتتحمل مسئوليته بس نقول احنا محتاجين وقت نقول احنا محتاجين معلومات أكثر.

أ.هاجر: هى بتستعملنى شويه قصاد باباها

د. يحيى: مافيش مانع تستعملك، بس وانتى واعية

أ.هاجر: بس انا مش قادره برضه اقف قصاد باباها، باباها صعب جدا، وحش بجد، حاسة إنه بيستعملنى هو راخر الناحية الثانية

د. يحيى: شوفى يا بنتى، ما هو "مَنْ استعملكَ فرضيتَ باستعماله فأنتَ الرئيس"، ده مثل أنا مركبه، مستلفه من المثل الأصلى، من خدعك فخدعت له فهو مخدوع، يعنى لما بتبقى واعية إنه بيستعملك، وتسببه يتهيأله إنه بيستعملك، حاتبصى تلاقىكى بتعملى اللى انت شافاه صح، من غير ما تخشى فى مواجهة معاها، العلاج جزء منه إن العيان وساعات أهله يستعملونا بس برضانا، واحنا فى كامل وعينا ومسئوليتنا،

أ.هاجر: بس ده صعب

د. يحيى: ما انتى عارفة، ما هى شغلتنا صعب، واحنا اخترناها، مش كده ولا إيه؟

أ.هاجر: أيوه صحيح، شكرا

- [1]نشرة الإنسان والتطور: 5-1-2010-2010.rakhawy.net

إرتباط كامل النص:

www.arabpsynet.com/Rakhawy/RakD091218.pdf



شبكة علوم النفس العربية

نحو لياقة نفسانية أفضل

مؤسسة العلوم النفسية العربية
معا ... نذهب أبعد